

## 1. Von vnnutzē buchern

Den vordantz hat man mir gelan  
Danñ jch on nutz vil bücher han  
Die jch nit lyß / vnd nyt verstan



Abb.: *Von vnnutzē buchern*

Das jch sytz vornan jn dem schyff  
Das hat worlich eyn sundren gryff  
On vrsach ist das nit gethan  
Vff myn libry ich mych verlan

- 5 Von büchern hab ich grossen hort  
Verstand doch drynn gar wenig wort  
Vnd halt sie dennacht jn den eren  
Das ich jnn wil der fliegen weren  
Wo man von künsten reden düt
- 10 Sprich ich / do heym hab jchs fast güt  
Do mit loß ich benügen mich  
Das ich vil bücher vor mir sych /  
Der künig Ptolomeus bstelt  
Das er all bücher het der welt

- 15 Vnd hyelt das für eyn grossen schatz  
Doch hat er nit das recht gesatz  
Noch kund dar vß berichten sich  
Ich hab vil bücher ouch des glich  
Vnd lys doch gantz wenig dar jnn
- 20 Worvmb wolt ich brechen myn synn  
Vnd mit der ler mich bkümbren fast  
Wer vil studiert / würt ein fantast  
Ich mag doch sunst wol sin eyn here  
Vnd lonen eym der für mich ler
- 25 Ob ich schon hab eyn groben synn  
Doch so ich by gelerten bin  
So kan ich jta sprechen jo  
Des tütschen orden bin ich fro  
Danñ jch gar wenig kan latin
- 30 Ich weyß das vinū heysset win  
Gucklus ein gouch / stultus eyn dor  
Vnd das ich heyß domne doctor  
Die oren sint verborgen mir  
Man sæh sunst bald eins mullers thier

LXVI. von erfahrung aller land

Wer vß misßt hymel / erd / vnd mer  
Vnd dar jnn sücht lust / freüd / vnd ler  
Der lûg / das er dem narren wer



Abb.: von erfahrung aller land

Ich halt den ouch nit jtel wiß  
Der all syn synn leidt / vnd syn fliß  
Wie er erkund all stett / vnd landt  
Vnd nymbt den zyrckel jn die hant

- 5 Das er dar durch berichtet werd  
Wie breit / wie lang / wie witt die erd  
Wie dieff / vnd verr sich zieh das mer  
Vnd was enthalt den letsten spoer /  
Wie sich das mer zû end der welt
- 10 Haltt / das es nit zû tal ab felt  
Ob man hab vmb die gantz welt für  
Was volcks wone vnder yeder schnûr /  
Ob vnder vnsern füssen lüt  
Ouch sygen / oder do sy nüt
- 15 Vnd wie sie sich enthaltten vff  
Das sie nit fallen jnn den lufft /  
Wie man vß mit eym stæcklin ræch  
Das man die gantze welt durch sæch  
Archymenides der wust des vil

- 20 Der macht jm puluer / kreiß vnd zyl  
Do mit er vil vßræchen kundt  
Vnd wolt nit vff tûn synen mundt  
Er vorecht es ging eyn plast dar von  
Das jm an kreysen ab wurd gon
- 25 Vnd ee er reden wolt eyn wort  
Lyeß er ee das er wurd ermort /  
Der messen kunst was er behend  
Kund doch vß ecken nit syn end /  
Dycearchus der fleiß sich des
- 30 Das er die høeh der berg vß meß  
Vnd fandt das Pelyon høher waß  
Dann alle berg die er ye mæß  
Doch maß er nit mit syner handt  
Die Alppen hoch jm Schwitzer landt
- 35 Maß ouch nit wie tieff wer das loch  
Do hyn er müst / vnd sitzet noch /  
Ptolomeus rechnet vß mit gradt  
Was leng vnd breyt das ertrich hatt /  
Die leng zücht er von oryent
- 40 Vnd endt die selb jnn occident /  
Das hundert / achtzig grad er acht /  
Sechtzig vnd dryg / gen mitternacht  
Die breyt vom equinoccial  
Gen mittemtag / ist sie me schmal
- 45 Zwentzig vnd funf er fyndet gradt  
Des lands so man erkundet hat  
Plynius ræcht das mit schritten vß  
So machet Strabo mylen druß  
Noch hat man sythar funden vile
- 50 Landt / hynder Norwegen vnd Thyle /  
Als jblant vnd pylappenlandt  
Das vorhyn alls nit was erkandt /  
Ouch hatt man sydt jnn Portigal  
Vnd jnn hispanyen vberall
- 55 Golt / jnslen funden / vnd nacket lüt  
Von den man vor wust sagen nüt /  
Marinus / noch dem mer / die welt  
Ræchnt / vnd hat drann gar wüst gefælt /  
Plinius der meyster seitt
- 60 Das es sy eyn vnsynnikkeit  
Wellen die grœß der welt verston

- Vnd vsser der / by wilen gon  
Vnd ræchnen biß hynder das mer  
Dar jnn menschlich vernunfft jrret ser
- 65 Das sy solchem noch ræchen allzyt  
Vnd kan sich selb vß ræchen nitt /  
Vnd meynt das er die ding verstat  
Das die welt selbs nit jn jr hat /  
Hercules setzt jnn das mer
- 70 Zwo sülen (als man seit) von ere /  
Die eyn die endet Affricam  
Die ander vocht an Europam /  
Vnd hatt groß acht vff end der erdt  
Wust nit / was end jm was beschert
- 75 Dann der all wunderwerck veracht /  
Der wart durch frowen list vmbbracht /  
Bacchus zoch vmb mit grossem her  
Durch alle landt der welt / vnd mer  
Vnd was alleyn der anschlag syn
- 80 Das yederman lert drincken wyn  
Wo man nit wyn vnd reben hett  
Do lert er machen byer vnd mett /  
Sylenus der verlag sich nit  
Im narrenschyff für er ouch mit
- 85 Vnd sunst juffkynd vnd metzen vil  
Mit grosser freüd vnd seitten spyl /  
Er ist eyn drunckner schelm gesyn  
Das jm so wol was mit dem wyn /  
Er dürfft nit arbeit han ankert
- 90 Man hett sunst drincken wol gelert  
Man tribt mit prassen noch vil schand  
Ietz fært er erst recht vmb jm land  
Vnd macht manchē jm prasß verrücht  
Des vatter nye kein wyn versücht
- 95 Aber was wart Baccho dar von  
Er müst zû letst von gsellen gon  
Vnd faren hyen do er yetz dringkt  
Das jm me durst / dann wollust bringt  
Wie wol die heyden jn dar noch
- 100 Ertten als gott / vnd hyltten hoch /  
Von denen kumen ist sytthar  
Das man jm landt vmb bæchten far  
Vnd dût dem ere noch synem dott  
Der vns vil übels hat vff brocht

- 105 Dye böß gwonheyten wærent lang  
Was vnrecht ist nymbt vberhang  
Dann dar zû stæts der tûfel bloßt  
Das man syn dienstbarkeit nit losßt /  
Do mit ich ouch yetz wider vmb
- 110 Vff myn matery vnd fürnem kumb  
Was nott wont doch eym menschen by  
Das er sûch græssers dann er sy  
Vnd weißt nit was jm nutz entspring  
Wann er erfart schon hohe ding
- 115 Vnd nit die zyt syns todes kennt  
Die wie eyn schætt von hynnan rennt  
Ob schon dis kunst ist gwyß vnd wor  
So ist doch das eyn grosser tor  
Der jn sym synn wygt so gering
- 120 Das er well wissen frömde ding  
Vnd die erkennen eygentlich  
Vnd kan doch nit erkennen sich  
Ouch gdenckt nit wie er das erler  
Er sûcht alleyn rûm / weltlich ere /
- 125 Vnd gdenckt nit an das ewig rich  
Wie das witt ist / schœn / wunderlich /  
Dar jnn dann ouch vil wonung sint  
Vff jrdeschs yeder narr erblyndt  
Vnd sûcht syn freüd / vnd lust dar jnn
- 130 Des er me schad hatt dann gewynn  
Vil handt erkundt / verr / frömbde lant  
Do keyner nye sich selbs erkant /  
Wer wis würd als Vlysses wart  
Do er lang zyt für vff der fart
- 135 Vnd sach vil land / lüt / stett / vnd mer  
Vnd mert sich stæt jn gütter ler /  
Oder als dett Pythagoras  
Der vß Memphis geboren was /  
Ouch Plato durch Egypten zoch
- 140 Kam / jn Italiam dar noch  
Do mit er ye mer tæglich lert  
Das syn kunst / wißheit / würd gemert /  
Appollonius durch zoch all ort  
Wo er von gelertten sagen hort
- 145 Den stellt vnd zoch er tæglich noch  
Das er jn künsten würd me hoch

Fandt allenthalb das er me lert  
Vnd das er vor nit hatt gehœrt /  
Wer yetz solch reyß vnd lantfar dæt

150 Das er zû nem jnn wißheit stæt  
Dem wer zû vber sehen baß  
Wie wol doch nit genûg wer das /  
Dann wem syn synn zû wandeln stot  
Der mag nit gentzlich dienen got